

## యోహాను రెగిడ్లి మొదొల్చి ఉత్త్రమ్ బారిక్ జలొ యోహాను రెగిడ్లి మొదొల్చి ఉత్త్రమ్

1 మొదొల్ తెంతొ తిలిసి, అమ్ సూన్లిసి, అమ్చ సొంత అంకివొ దెకిలిసి, దెక సొంత అత్తో చడ్లిసి చి రిసొ తుమ్క సూనయ్తసుమ్, రెగ్డితసుమ్.\* మెలె, †ఎత్కిక దొర్కు జలి జీవ్ జలిసి, దొర్కు జలి జీవ్ జోతె దొర్కు జతిన్చి రిసొచి దేముడుచి కోడు జలి జీవ్ దెతి దేముడుచి కోడుతె తిలిన్చి రిసొ రెగ్డితసుమ్. 2 క్రీస్తు జలొ దెకయ్ జలి జీవుక ‡ఈంజ లోకుమ్తె జో జెర్మున్ జా అయ్లిన్ జలిన్ తెన్ అమ్క రుజ్జు జా అస్సె. అమ్ దెకిలమ్, సొచి జా సంగితసుమ్, చి జో 'ఎత్కిచి కంట అగ్గె తెంతొ దేముడు తెన్ తిలి కెయ్చక తెయ్చక తాఁ గెతి జీవు, చి జో ఈంజ లోకుమ్తె జెర్మున్ జా అమ్క డీస అస్సె' మెన ఒప్పన, తుమ్క సూనయ్తసుమ్. 3 అమ్ దెకిలిసి, అమ్ సూన్లిసి కిచ్చొక తుమ్కయ్ సూనయ్తసుమ్ రెగ్డితసుమ్ మెలె, తుమ్క ప్రబు దెతి రచ్చన, జో దెతి సర్దచి వాటతె అమ్చి తెన్ బెదుత్. అమ్చి తెన్ తుమ్చి తెన్ బెదితిన్చి కట్టు దేముడు అబ్బొన్ తెన్ చి జోచొ పుత్తన్ జలొ యేసుక్రీస్తు తెన్ అమ్క బెదవ అస్సె. 4 అమ్చి సర్దనంతొసుమ్ పూర్తి జవున్ మెనయ్ ఈంజ ఉత్త్రమ్ రెగిడ్లిసుమ్.

### దేముడుచి ఉజిడ్తె ఇండ

5 ప్రబుతె సూన తుమ్కయ్ అమ్ సూనయ్తి కబుర్ కిచ్చొ మెలె, దేముడు †ఉజిడి జా అస్సె, చి జోతె కిచ్చొ అందర్ నాయ్. 6 జో తెన్

\* **1:1** 1:1 నెంజెలె, 'మెలె, దొర్కు జలొ జీవ్ తిలి దొర్కు జలి జీవ్ దెతి కోడు జలొ యేసుక్రీస్తుచి రిసొ రెగిడ్లిసుమ్'. యోహాను 1:1-4, 14 దెక. † **1:1** 1:1 యోహాను 1:4, బారికుల్ 5:20 దెక. ‡ **1:2** 1:2 యోహాను 1:14. § **1:5** 1:5 యోహాను 1:4, 5, 9, 14, 8:12, 9:5, 12:46, యాకోబు 1:17 దెక.

బెద జో తెన్ ఇండితసుమ్ మెనంతసుమ్, గని \*అందర్బుద్ది తెన్ ఇండితసుమ్ జలె, అబద్దుమ్చ జా సత్తిమ్ ఇండుమ్ నాయ్. <sup>7</sup> గని, జో కీసి ఉజడి అస్సె గే, ఆమ్ కి దస్సి †ఉజిడే బుద్ది తెన్ ఇండితసుమ్ జలె, ఎక్కిలో తెన్ ఎక్కిలో బెద ఎక్కి కట్టు తెన్ ఇండితసుమ్, చి జోచొ పుత్తుసి యేసు ‡సిలువతె జో మొర అర్చితుమ్ జలిన్చి జోచి నూయి జలి లోయి అమ్చి పాపుమ్ ఎత్తి పుంచ అమ్క సుద్ది కెర్తె అస్సె.

### పాపుమ్ ఒప్పున్తిన్చి రినా

<sup>8</sup> 'అమ్క పాపుమ్ నాయ్' మెన అమ్ ఏక్ వేల సంగనై, అమ్క ఆమి మోసిమ్ కెరంతసుమ్, సత్తిమ్ అమ్చి పెట్టి నాయ్. <sup>9</sup> గని అమ్ కెర్ల పాపల్ దేముడుచి మొక్కి అమ్ ఒప్పునై, జో నిదానుమ్ సత్తిమ్ కెర్తొసా, చి అమ్చి పాపుమ్ చెమించుప కెర అమ్ పాపుమ్ తెన్ నే తతి రితి జో అమ్క సుబ్బుమ్ కెరెదె. <sup>10</sup> అమ్ కెర్లె పాపుమ్క 'పాపుమ్ కెరుమ్ నాయ్' మెన అమ్ సంగిలె, జోకయ్ 'అబద్దుమ్చొ' మెన సంగిల్ రితి జతనుమ్, చి జోచి కోడు అమ్చి పెట్టి నాయ్, 'పాపుమ్ సుదల్' మెన జో అమ్క సంగిలి కికోడు ఒప్పునుమ్ నాయ్.

## 2

### పాపుమ్ కెరుక పొన

<sup>1</sup> అంచ ప్రేమ తిల పుత్తర్లు, తుమ్క 'పాపుమ్ కెర్లు నాయ్' మెనయ్ తుమ్క ఆవ్ ఈంజ రెగిడ్తసి. గని ఏక్ వేల అమ్ కో పాపుమ్ కెర్లె, ఎత్తిక అబ్బొ జలొ దేముడు లోకుమ్ ఎత్తిచ మాన్సుల్క తీర్పు కెర్తెన్తె, అమ్క ఎక్కిలో తోడే సంగితొసా అస్సె. పూర్తి పున్నిమ్ తిలొ

\* **1:6** 1:6 యోహాను 3:19, 20, 11:9-10, 12:35, కొరింధిల్క రెగిడ్లి 2 నంబర్ ఉత్త్రమ్ 6:14. † **1:7** 1:7 మత్తయి 5:14, 16, యోహాను 3:21, 12:36, బారికుల్ 13:47, రోమియల్ 13:12, ఎపెసు 5:8, దెస్సలొనీకుల్క రెగిడ్లి 1 నంబర్ ఉత్త్రమ్ 5:5 దెక. ‡ **1:7** 1:7 కొలోస్సియూల్ 1:20, 2:14, పేతురుక రెగిడ్లి 1 నంబర్ ఉత్త్రమ్ 2:24, మత్తయి 27:32-54, మార్కు 15:21-39, లూకా 23:26-48, యోహాను 19:17-37 దెక. § **1:10** 1:10 రోమియల్ 3:10, 23, 5:12.

యేసుక్రీస్తు. <sup>2</sup> అమ్ కెర్ల పాపల్ గెచ్చయ్తి \*బలి జో జా అస్సె. ఎక్కి అమ్మి కెర్ల పాపల్ మెన నాయ్, గని ఒండి లోకుమ్చ మాన్సుల్ కెర్ల పాపల్ గెచ్చయ్తోసా జో జా అస్సె. <sup>3</sup> 'జోక అమ్ జానుమ్' మెన అమ్ కీసి జాన దయిరిమ్ తంక జయెదె మెలె, జోచ ఆగ్గుల్ రితి ఇండితసుమ్ జలెకయ్. <sup>4</sup> 'జోక జాని' మెన కో జలెకు సంగితయ్ గని జోచ ఆగ్గుల్ నే సూన్లి రితి జా కెర్తయ్ నాయ్ జలె, జో మాన్సు అబద్దుమ్చో, చి జోచి పెట్టి సత్తిమ్ నాయ్. <sup>5</sup> గని, ప్రబుచి కోడు కో కెర్తయ్ గే, జోచి పెట్టి దేముడుచి ఉప్పిర్చి ప్రేమ పూర్తి జా అస్సె. జలె, 'దేముడుచి రచ్చనచి తెడి అస్సుమ్' మెన అమ్ కీసి పూర్తి దయిరిమ్ జంక జయెదె మెలె, <sup>6</sup> †జోచి తెడి అస్సుమ్. జో తెన్ బెద అస్సుమ్. జోచి జివ్క జితసుమ్' మెన సంగనై, యేసుక్రీస్తుయి ఇండిలి రితి ఆమ్ కి ఇండుకయ్.

### ఎక్కిలోక ఎక్కిలో ప్రేమ కెర

<sup>7</sup> ప్రేమ తిల గోతుసుదల్, తుమ్క ఆవ్ రెగిడ్డిసి నోవి ఆగ్గు నెంజె, గని మొదోల్ తెంతో తుమ్క దొర్కు జలి ఆగ్గు. అగ్గె తెంతో చి జా ఆగ్గు తుమ్ సూన్లి కోడు. <sup>8</sup> జలెకి, యేసుక్రీస్తు దిలి ‡నోవి ఆగ్గు తుమ్క ఆవ్ రెగిడ్డిసి. తుమ్ ఎక్కిలోక ఎక్కిలో ప్రేమ కెరుకయ్. ఈంజ ఆగ్గు జో యేసుక్రీస్తుచి తెడి నెరవెర్పువ జతయ్, తుమ్చి తెడి కి నెరవెర్పువ జతయ్. కీసి మెలె, అందర్ కేడ గెతె అస్సె, చి నిజామ్చి ఉజిడి అప్పె కి లగుక దెర అస్సె. <sup>9</sup> 'ఉజిడ్చి తెడి అస్సి' మెన కో సంగనై కి జోచో కేన్ బావొక జో విరోదుమ్ అస్సె జలె, జో అప్పొక అందర్చి తెడి అస్సె. <sup>10</sup> జోవయించ బావుడ్లు జల రిత అన్నె మాన్సుల్క కో ప్రేమ కెర్తయ్ గే, జోయ్యి ఉజిడ్చి తెడి జితయ్, చి ఈంజ ఉజిడ్తె కక్క తప్పు కెరయ్తిసి కిచ్చో కి తయె నాయ్. <sup>11</sup> గని, బావొ జలో అన్నె కేన్ మాన్సుక కో విరోదుమ్ కెర్తయ్ గే, అందర్చి తెడి అస్సె. అందర్చి

\* 2:2 2:2 1:7చి ఎట్టాచి చికోడు దెక. † 2:6 2:6 యోహాను 15:3-10 దెక. ‡ 2:8 2:8 యోహాను 13:34 చి మత్తయి 22:37-40.

తెడి ఇండితయ్, చి జో కేనె గెతయ్ గే జో నేనె. కిచ్చొక మెలె, అందర్ జోక గుడ్డి కెర అస్సె.

12 ప్రేమ తిల బోదల్, తుమ్క కిచ్చొక రెగిడ్డసి మెలె, జో యేసుక్రీస్తుచి నావ్చి రిసా జోచి నావ్చి తెడి తుమ్ కెర్ల పాపల్ చెమించుప జా అస్తి.

13 తుమ్ అబ్బదింసి మొదొల్ తెంతో జోక తుమ్ జాన్సుచి రిసా తుమ్క రెగ్గితసి. తుమ్ ఉబెడల్, పాపుమ్ కెరయ్తో నయ్తాన్చి ఉప్పిరి తుమ్ జిన అస్సున్చి రిసా తుమ్క రెగ్గితసి. తుమ్ బాలబోదల్, ఎత్కిక అబ్బొ జలో దేముడుక తుమ్ జాన్సుచి రిసా తుమ్క రెగ్గితసి.

14 అబ్బదింసిక, తుమ్ మొదొల్ తెంతొచొక తుమ్ జోక జాన్సుచి రిసా తుమ్క రెగ్గితసి. ఉబెడల్, తుమ్ ఆత్మతె డిట్టుమ్ జా అస్సున్, చి దేముడుచి కోడు తుమ్చి పెట్టి అస్సె, తుమ్చి పెట్టి కామ్ కెర్తయ్, చి నయ్తానుక తుమ్ జిన అస్సున్చి రిసా తుమ్క రెగ్గ అస్సి.

15 ఈంజ లోకుమ్క చి ఈంజ లోకుమ్చి కిచ్చొ కి తుమ్ ప్రేమ జా నాయ్. ఈంజ లోకుమ్చి కో ప్రేమ అస్తి గే, ఎత్కిక అబ్బొ జలో దేముడుచి ఉప్పిర్చి ప్రేమ జోచి పెట్టి నాయ్. 16 కిచ్చొక మెలె, ఈంజ లోకుమ్తె తిలిన్ ఎత్కి, ఆగ్ ఆన జతిసి, అంకివో ఆన జతిసి, అస్తిచి గవురుమ్ కి, ఎత్కిక అబ్బొ జలో దేముడుచి తెంతో చి బుద్ది నెంజె, గని ఈంజయ్ లోకుమ్చి బుద్దిచి, జా. 17 అన్నె, ఈంజ లోకుమ్, ఈంజ లోకుమ్చి అస్తిచి ఉప్పిరి ఆన జతిసి ఎత్కి కేడయ్ గెతిసి, గని దేముడుచి ఇస్టుమ్ రితి కో ఇండుల గే, జెవ్వి కెయ్క తెయ్క తా గెచ్చుల.

### క్రీస్తుక విరోదుమ్ తిలొసా

18 ప్రేమ తిల పుత్తర్లు, ఆకర్చి గడియ, ఈంజ. క్రీస్తుచి ఉప్పిరి విరోదుమ్ తిలొసా బార్ జయెదె మెన నూన అస్సున్, గెద. దస్సి, అప్పె క్రీస్తుచి ఉప్పిరి విరోదుమ్ జలన ఒగ్గర్జిన్ బార్ జా అస్తి. జాకయ్, ఇన్నెక 'ఆకర్చి గడియ ఈంజ' మెన జానుమ్. 19 'జోచి ఉప్పిరి జేవ్ విరోదుమ్ జలన అమ్చితె తెంతో బార్ జా గెల' మెనుక జయెదె, గని జోవయింక 'అమ్చి తెన్ ఎక్కి జా తిల' మెనుక నెంజె. కిచ్చొక మెలె,

అమ్చి తెన్ ఎక్కి జత జలె, అమ్చి తెన్ తాఁ గెత. గని నాయ్, బార్ జా ముల దిల, చి అమ్చి తెన్ ఎక్కి నెంజితి మెన రుజ్జు డీస్తయ్. జేవ్ ముల్తిన తెన్ జా రుజ్జు డీసుక మెన సెలవ్ తిలి.

20 తూమ్, మాత్తూమ్, పరలోకుమ్చి సుద్ది తిలోసా జోచి ఆత్మక తుమ్క బోడి ఉప్పిర్ సువిల్ రితి జా, 'అంచయ్' మెలి రితి తుమ్క జోచి గుర్తు కెర అస్సె. జాకయ్, తుమ్ జోచయ్ జలన ఎత్తిజిన్ సత్తిమ్ జాన్సు. 21 జలె, తుమ్క 'సత్తిమ్ నేన్తి' మెన రెగ్గి నాయ్, గని సత్తిమ్ జాన్సుచి రిసాయి రెగిడ్డసి. కేన్ అబద్దుమ్ తిలె, సత్తిమ్ తెంతో జెయె నాయ్ మెన కి జాన్సు.

22 జలె, కొన్సో జో అబద్దుమ్ జతోసా జయెదె మెలె, యేసుక 'జోచి రాజిమ్తె మాన్సుల్క బెదయ్తో రచ్చించుప కెర్తొసా జతి దేముడు తెద్రయ్లో క్రీస్తు జో నెంజె' మెన సంగితోసా సికడ్డొసా. క్రీస్తుచొ దేముడు అబ్బొన్క 'అబ్బొన్ నెంజె', క్రీస్తు పుత్తున్క 'దేముడుచొ పుత్తున్ నెంజె' మెన కో సంగితయ్ సికడ్డయ్ గే, జొయ్యి క్రీస్తుచి విరోదుమ్ జలోసా.

23 క్రీస్తు పుత్తున్క 'దేముడుచొ పుత్తున్ నెంజె' మెన కో సంగితయ్ సికడ్డయ్, జోక ఎత్తిక అబ్బొ జలో జో దేముడుచొ మాన్సు నెంజె, జో మాన్సుచి పెట్టి నాయ్. క్రీస్తు పుత్తున్క కి 'దేముడుచొ పుత్తుసి నిజుమి జొయ్యి జయెదె' మెన కో \* ఒప్పన్తయ్ గే, దేముడు అబ్బొన్చొ మాన్సుకి జో జా అస్సె, జోవయించి పెట్టి ఎత్తిక అబ్బొ జలో దేముడు అస్సె. 24 క్రీస్తుచి రిసా తుమ్ మొదొల్ తెంతో సూన్లిసి తుమ్చి పెట్టి తాఁ గెస్సు. తుమ్ మొదొల్ తెంతో సూన్లిసి తుమ్చి పెట్టి తాఁ గెలె, కామ్ కెర్తె తిలె జలె, దేముడు పుత్తున్చి తెడి కి దేముడు అబ్బొన్చి తెడి కి తాఁ గెతె, జోచి తెన్ † ఇండితె తస్సె. ‡ 25 జోచి రాజిమ్తె అప్పె కి బెదితి, పరలోకుమ్తె కెయఁక తెయఁక జితి చెంగిల్ తతి వాట అమ్క తుమ్క జో ప్రమానుమ్ సంగిలిసి కోడు.

§ 2:23 2:23 3:23, 4:15, 5:1, 5, 13, 20 డెక. \* 2:23 2:23 మత్తయి 10:32-33 చి రోమియూల్ 10:9-10 డెక. † 2:24 2:24 2:6 డెక. ‡ 2:24 2:24 యోహాను 15:4-10.

26 తుమ్మక మోసిమ్ కెరుక ఉచర్తనచి రిసా తుమ్మక ఈంజ రెగ్గితసి.  
 27 గని ప్రబు జోచి ఆత్మ తేల్ తుమ్మక బోడి ఉప్పిర్ నువిల్ రితి జలి గుర్తు తుమ్చి పెట్టి తత్తయ్ కామ్ కెర్తయ్. మెలె, జోచి ఆత్మ తుమ్చి పెట్టి తత్తయ్ తుమ్మక సికడ్తయ్, చి తుమ్మక కోమాన్సు సికడుక నాయ్. జలె, జోచి ఆత్మ తుమ్మక కిసి ఎత్కిచి రిసా సికడ్తయ్ గే, చి జోచి ఆత్మ కిసి సత్తిమ్ తా కిచ్చొ అబద్దుమ్ జయె నాయ్ గే, జా ఆత్మ తుమ్మక సికడ్తి రిసా, యేసుప్రబుచి తెడి తుమ్ తా జోచి జీవక జోచి ఆత్మనెక్కిక జో తెన్ ఇండితె.

28 అన్నె, అప్పె, ప్రేమ తిల పుత్తర్లు, 'యేసుప్రబుచి తెడి తుమ్ తా. జోచి జీవకయ్ జోచి ఆత్మనెక్కిక జియ జో తెన్ ఇండ' మెన అన్నె సంగితసి. ఇని తా గెలమ్ మెలె, జో అన్నె జెతి పొదిక, అన్నె డిస్సి పొదిక అమ్ లాజ్ నే బెట్టె, నే గుంచితె, దయిరిమ్ తెన్ తమ్దె. 29 జో 'పున్నిమ్చొ' మెన జాన్సు జలె, అన్నె కో సత్తిమ్ ఇండితతి గే, జేవ్ కి జోచి ఆత్మ తెన్ జెర్నున్ జా అస్తి మెన తుమ్ జాన.

### 3

1 ఎత్కిక అబ్బొ జలొ దేముడు అమ్క \*“అంచయ్ బోదల్, తూమ్” మెన అమ్క నావ్ తియ అమ్క కెర్ది ప్రేమ కెర అస్సె గే తుమ్ ఉచర! జో దస్సి కెర్తికయ్, నిజమి జోచ బోదల్ జలమ్! దస్సి మెన ఈంజయ్ లోకుమ్చి బుద్దిచ మాన్సుల్ కిచ్చొక తుమ్క చినితి నాయ్ మెలె, †జోకయ్ నేన్తి. 2 ప్రేమ జల గోతుసుదల్, అమ్ అప్పె కి దేముడుచ బోదల్ జా అస్సుమ్. అమ్ తెదొడక కిసి జమ్దె గే అప్పె డిసె నాయ్, గని కిచ్చొ జానుమ్ మెలె, యేసుప్రబు అన్నె డిసిలె, ‡జోచి రితి పూర్తి జమ్దె. జో కిసి అస్సె గే, తెదొడకయ్ కిచ్చొ అడ్డు నెంతె జోక సొస్టుమ్ దెకుమ్దె. 3 అన్నె, మదెనె, జోచి ఉప్పిరి కో ఇసి దయిరిమ్ తత్తచి జోక

\* 3:1 3:1 యోహాను 1:12-13. † 3:1 3:1 యోహాను 1:10-11, 8:54-55, 14:7, 17, 16:2-3, 17:25. ‡ 3:2 3:2 రోమియుల్ 8:19, 29, కొరిందిల్క రెగిడ్డి 2 నంబర్ ఉత్తమ్ 3:18, వెలిప్పియుల్ 3:21, కొరిందిల్క రెగిడ్డి 1 నంబర్ ఉత్తమ్ 15:49-50.

రకితతి గే, జో కిసి నుద్ది అస్సె గే, జేవ్ కి జోచి రితి నుద్ది కెరంతి రితి దెకన్తె తవుల.

4 పాపుమ్ కెర్టొ ఎత్కి మాన్సు ఆగ్గుల్ పిట్టయ్తయ్. ఆగ్గుల్ పిట్టయ్తసి ఎత్కి పాపుమ్. 5 పాపల్ గెచ్చవుక మెన యేసుప్రబు బార్ జలో మెనయ్, పడ్డొ జోతె కిచ్చొయ్ పాపుమ్ కి నాయ్ మెనయ్, తుమ్ జాన్సు. 6 కిజోచి తెడి తతో కేన్ మాన్సు పాపుమ్ ఇండె నాయ్. కో పాపుమ్ ఇండితయ్ గే, ప్రబుక \*దెకిలోసా నెంజె, జోక జాన్లోసా నెంజె.

7 ప్రేమ తిల పుత్తర్లు, తుమ్క కో మోసిమ్తె సేడవుక తుమ్ వాట్ దాన నాయ్. మెలె, కో సత్తిమ్ ఇండితయ్ గే, జో యేసుచి రితి జోచి తెన్ పున్నిమ్చొ జతయ్. 8 కో పాపుమ్తె ఇండితయ్ గే, సయ్తాన్చొ జయెదె. మొదొల్ తెంతొ సయ్తాన్ పాపుమ్ కెర్టొసా. సయ్తాన్చ కమొ గెచ్చవ గెలుకయ్ దేముడుచొ పుత్తుసి ఈంజ లోకుమ్తె బార్ జలో. 9 దేముడుచి నుద్ది తిలి ఆత్మతె జెర్మున్ జలో కేన్ మాన్సు పాపుమ్ ఇండె నాయ్. దేముడుచి నుద్ది తిలి ఆత్మ జోచి పెట్టి అస్సె, చి జో జా ఆత్మక జెర్మిలి రిసా జో మాన్సు పాపుమ్ ఇండుక నెత్తె. 10 ఇసికయ్ కో దేముడుచ బోదల్ జవుల గే, కో సయ్తాన్చ బోదల్ జవుల గే, చినుక జయెదె. కో సత్తిమ్ ఇండె నాయ్ గే, పడ్డొ †జోచ బావుడ్లు జల అన్నె మాన్సుల్క ప్రేమ దెకె నాయ్ గే, జో దేముడుచి నుద్ది తిలి ఆత్మ జెర్మున్చొ మాన్సు నెంజె.

### ఎక్కిలోక ఎక్కిలో ప్రేమ కెరుక

11 తుమ్ మొదొల్ తెంతొ నూన్లి కబుర్ ఈంజ, అమ్ ఎక్కిలోక ఎక్కిలో ‡ప్రేమయ్ తంక. 12 బావొన్క మార్లొ, ఎత్కిక పాపుమ్ సికడ్డొ సయ్తాన్ తెన్ బెదిలో కయ్యానుచి రితి తంక నాయ్. అన్నె, జో కిచ్చొక బావొన్క మార్లొ మెలె, జోచ సొంత కమొ పాపుమ్చ, బావొన్చ కమొ పున్నిమ్చచి రిసా దెకుక నెత్త గోసక మార్లొ. 13 బావుడ్లు, ఈంజ

§ 3:6 3:6 2:6, 24, 27, 28 దెక, చి 3:24, 4:13, 16 దెక. \* 3:6 3:6 యోహాను రెగిడ్డి 3 నంబర్ ఉత్తుమ్ 11 నంబర్ కోడు దెక. † 3:10 3:10 2:9, 10 దెక. ‡ 3:11 3:11 2:7-11 దెక.

లోకుమచ మాన్యుల్ తుమ్చి విరోదుమ్ జలిస్క తుమ్ ఆచారిమ్ జా నాయ్. 14 మొర్నుక ముల జీవ్ జతిన్తె పావ జా అస్సుమ్ మెన జానుమ్. నంవజల బావుడ్లుక ప్రేమ కెర్తసుమ్చి రిసా జానుమ్. కో ప్రేమ తెన్ తయె నాయ్ గే, మొర్నుతెయి అస్సె మెన జానుమ్. 15 జోచో కేన్ బావొచి ఉప్పిరి కో విరోదుమ్ తత్తయ్ గే, అత్య కెర్తొసా జతయ్, చి అన్నె కిచ్చొ జానుమ్ మెలె, అత్య కెర్తొ కేన్ మాన్యుచి పెట్టి పరలోకుమతె బెదితి కెయెక తెయెక చెంగిల్ తతి జీవ్ నాయ్.

16 కిచ్చొతె సత్తిమ్చి ప్రేమ చినుక సికిలమ్ మెలె, 'పాపుమ్ తెంతో రచ్చించుప జతు' మెనయ్ యేసుప్రబు అమ్చి రిసా జోచి జీవ్ దా మొర్లన్. అన్నె, అమ్చ బావుడ్లుక 'చెంగిల్ జతు' మెనయ్ అమ్ కి అమ్చి జీవ్ దిలె, చెంగిలి. 17 గని కక్క ఈంజయ్ లోకుమ్చి ఆస్తి తత్తయ్ గే, చి జోచో కేన్ బావుడ్డిక కొత్కు అస్సి మెన దెకిలె, గని జోక కన్నారుమ్ దెకె నాయ్ గే, దేముడుచి ప్రేమ జో మాన్యుచి పెట్టి అస్సె మెన కిసి సంగుక జయెదె! బెదె నాయ్. 18 ప్రేమ తిల పుత్తర్లు, రిత కొడొకయ్ అమ్ ప్రేమ కెరుక పొన, గని సత్తిమ్చి ప్రేమ అమ్చి పెట్టి తా, అమ్చ కమొతెయి అమ్చి ప్రేమ దెకవుమ, అమ్చ కమొతెయి నెరవెర్పువ జవున్!

19 ఇసి, అమ్చి ప్రేమ అన్నె మాన్యుల్క తోడ్ కెర్తొ కమొతెయి బార్ కెర్లెకయ్ 'సత్తిమ్ జలమ్' మెన చినుమ్దె, చి కెయెక జవున్ కి 'సత్తిమ్చ నెంజుమ్ సిచ్చుక విలువ జలస ఆము' మెన లాజ్ జా అమ్చి పెట్టి బాద సేడ్లె, 'జో దిలి ప్రేమ అమ్చ కమొతె నెరవెర్పువ కెర్తసుమ్' మెన ఉచార కెరన. 20 ప్రబుచి మొక్కె అన్నె దయిరిమ్ జమ్దె, 'లాజ్ నెంతె జోచి మొక్కె టీవ్క జయెదె' మెన అమ్చి పెట్టి

§ 3:19 3:19 ఊనయ్లిసి 12:9-11 దెకిలె, సయ్తాన్ అమ్క 'ఇసి దస్సి కెర్ల' మెన ఎత్తి. అదికారుమ్ తిలో దేముడుచి మొక్కె అమ్క నేరిమ్లు వయడుక ఉచర్తయ్, గని క్రిస్తు అమ్చి పాపుమ్ వయ గెచ్చయ్లి రిసా ఎత్తి. అదికారుమ్ తిలో దేముడు అమ్క జా నేరిమ్ వయడె నాయ్, చి సయ్తాన్ ఓడువ జతయ్.



అన్నె దయిరిమ్ జమ్దె. కిచ్చొక మెలె, \* అమ్చి పెట్టి తిలిన్చి కంట జో వెల్లో, చి జో ఎత్తి జానె. <sup>21</sup> జలె, ప్రేమ తిల గోతుసుదల్, అమ్చ కమొచి రిసా అమ్చి పెట్టి అమ్ లాజ్ జంక నాయ్ జలె, దేముడుచి మొక్కె అమ్క దయిరిమ్ తయెదె. <sup>22</sup> అన్నె, జోవయించి మొక్కె అమ్ లాజ్ జంక నాయ్ జలె, జోచి ఇస్తుమ్ రితి ఇండితసుమ్చి రిసా జో మెన్నితిసి కెర్తసుమ్చి రిసా, జోతె అమ్ కిచ్చొ సంగిలె, జో అమ్క దొర్కు కెర్తయ్.

<sup>23</sup> ఈంజయి జోచి ఆగ్గు. జోచొ పుత్తున్ జలొ యేసుక్రీస్తుచి నావ్చి ఉప్పిరి అమ్క నముకుమ్ తంక, యేసుక †నిజుమి దేముడుచొ పుత్తుసి, నిజుమి జోచొ పుత్తున్ జా జోచి అదికారుమ్ తిలొ తెద్రయిందె మెన జో సంగ తిలొ క్రీస్తు రచ్చించుప కెర్తొసా జొయ్యి మెనయ్ జోచి ఉప్పిరి అమ్ అమ్చి నముకుమ్ తింక, చి జో క్రీస్తు ప్రబు అమ్క ఆడ్ర దిలి రితి, ఎక్కిలొక ఎక్కిలొ అమ్ ప్రేమయ్ కెరుక. <sup>24</sup> జోచ ఆగ్గుల్ రితి ఇండితన ఎత్తిజన్ ‡జోచి తెడి తత్తతి, జోచి జివ్క జోచి ఆత్మసెక్కిక జితతి, చి జోవయించి పెట్టి జొయ్యి తత్తయ్, జోవయింక జొయ్యి తోడు తత్తయ్, అన్నె, అమ్చి పెట్టి జో తతిసి జో అమ్క తోడ్ తతిసి అమ్ కిసి జానుమ్ మెలె, అమ్చి పెట్టి జో దిలి జోచి ఆత్మ తతికయ్ జానుమ్.

## 4

### ఆత్మల్క కీసి చినుక జయెదె

<sup>1</sup> ప్రేమ తిల గోతుసుదల్, ఎత్తి ఆత్మ సంగితిన్క 'దేముడుచి కోడు ఈంజ' మెన నే పరిచ్చ కెరై తుమ్ నంప కెర నాయ్. గని నిజుమి దేముడుచ జతతి గే నాయ్ గే, తుమ్క కిచ్చొ కిచ్చొ సికడ్డనచ

\* **3:20** 3:20 కిచ్చొ జవున్ అమ్ కెర్లి కామ్క 'తప్పు కెర్లమ్' నెంజిలె, 'ఏక్ వేల తప్పు కెర్లమ్. లాజు' మెన అమ్చి పెట్టి బాద సేడ్లె, జా కామ్క 'తప్పు గే నెంజె గే' జొయ్యి జానె, చి కిచ్చొక దస్సి కెర్లమ్ గే జొయ్యి జానె, చి తప్పు కెర్లె కి జో చెమించుప కెరుక జోవయింక సెక్కి అస్సె. చి అమ్చి ఉప్పిర్చి అమ్చి అన్యాయుమ్ జో గెచ్చువుక తెరె. † **3:23** 3:23 2:23, 4:15, 5:1, 5, 13 చి 5:20 దెక. ‡ **3:24** 3:24 2:6, 24, 27, 28, 4:13, 16, చి యోహాను 15:3-10 దెక.

ఆత్మల్ తుమ్ పరిచ్చ కెర. కిచ్చొక మెలె, 'దేముడుచ కబుర్లు అమ్మి సంగితసుమ్' మెన అబద్ధుమ్క ఒగ్గర్జిన్ ఈంజ లోకుమ్తె బార్ జా అస్తి. <sup>2</sup> దేముడుచి సుద్ది తిలి ఆత్మ తెంతో తిలిసి కీసి చినుక జయెదె మెలె, యేసుక 'జో నిజుమి క్రీస్తు జలొ దొర్కు జలొ రచ్చించువ కెర్టొసా, నిజుమి దేముడుచొ పుత్తున్ జా, జో మాన్సు జా జెర్మున్ జా బార్ జలన్' మెన కేన్ ఆత్మ ఒప్పనుల గే, జో ఆత్మ దేముడు తెంతొచ మెనయ్ చినుక జయెదె, <sup>3</sup> అన్వె, యేసుక 'జోయ్య' మెన కేన్ ఆత్మల్ ఒప్పన్తి నాయ్ గే, జేవ్ దేముడు తెంతొచ ఆత్మల్ నెంజితి. 'బార్ జయెదె' మెన తుమ్ సూన్లి ఆత్మ, మెలె, క్రీస్తుచి ఉప్పిరి విరోదుమ్ జలొసాచి ఆత్మ, అప్పెయి కి ఈంజ లోకుమ్తె బార్ జయె అస్సి.

<sup>4</sup> ప్రేమ తిల పుత్తర్లు, తుమ్ దేముడుచ మాన్సుల్ జా అస్సున్, జోచి ఆత్మతె జెర్మున్ జా అస్సున్, చి జేవ్ అబద్ధుమ్చచి ఉప్పిరి తుమ్ జీన అస్సున్. కీసి మెలె, ఈంజ లోకుమ్తె తతోసాచి కంట తుమ్చి పెట్టి తతోసా వెల్లి. <sup>5</sup> జేవ్ అబద్ధుమ్చ ఆత్మల్చ మాన్సుల్ ఈంజయి లోకుమ్చ జవులచి రిసా, జేవ్ సంగితిసి ఈంజయ్ లోకుమ్చి బుద్దిచి, చి జోచి కోడు ఈంజయి లోకుమ్చ మాన్సుల్ సూన్తతి. <sup>6</sup> ఆమ్, మాత్తుమ్, దేముడుచ మాన్సుల్ జా అస్సుమ్, జోచి ఆత్మ తెన్ జెర్మున్ జా అస్సుమ్, చి జో దేముడుక కో జాన్తి గే, అమ్చి కోడు సూన్తతి, చి కో దేముడుచ మాన్సుల్ జతి నాయ్ గే, అమ్చి కోడు జేవ్ సూన్తి నాయ్. ఇసి, జలె కేన్ ఆత్మ సత్తిమ్చి గే కేన్ ఆత్మ తప్పచి గే చినుక జయెదె.

### దేముడు ప్రేమయ్

<sup>7</sup> ప్రేమ తిల గోతుసుదల్, ఎక్కిలోక ఎక్కిలో ప్రేమ కెరుమ! ప్రేమ దేముడు తెంతో చి, చి కో ప్రేమ ఇండితయ్ గే, జో దేముడుచి సుద్ది తిలి ఆత్మ తెన్ జెర్మున్ జా అస్సి, చి దేముడుక జో జానె. <sup>8</sup> గని కో ప్రేమ ఇండితి నాయ్ గే, దేముడుక నేన్తి. కిచ్చొక మెలె, దేముడు ప్రేమయి జా అస్సి. <sup>9</sup> కిచ్చొతె దేముడుచి ప్రేమ డీస అమ్క రుజ్జు జలి మెలె,

జో దేముడు జోచో సొంత పుత్తునక ఈంజ లోకుమ్తె తెద్రయ్లన్. జో బలి జలిన్క అమ్చి పాపుమ్ గెచ్చవ పరలోకుమ్తె బెదితి జివ్ అమ్క దెతి రిసా. <sup>10</sup> ప్రేమ ముక్కిమ్క కిచ్చొతె డీస్తయ్ మెలె, అమ్ దేముడుక కిచ్చొ ప్రేమ కెర్లిన్తె నాయ్, మాన్సుల్చి అమ్చి ప్రేమ కిచ్చొ నెంజె, గని జొయ్యి అమ్క ప్రేమ కెర, అమ్ కెర్ల పాపల్ పుంచితె అర్పితుమ్ జో జతి రిసా, జోచో పుత్తునక ఈంజ లోకుమ్తె తెద్రయ్లో. <sup>11</sup> జలె, ప్రేమ తిల గోతుసుదల్, ఎత్తి అదికారుమ్ తిలొ దేముడు అమ్క తెద్ది ప్రేమ కెర్లొ జలె, అమ్ కి ఎక్కిలోక ఎక్కిలో తెద్ది ప్రేమ కెరుక. <sup>12</sup> కేన్ మాన్సు కెయ్ దేముడుక దెకుక నాయ్. గని అమ్ ఎక్కిలోక ఎక్కిలో ప్రేమ కెర్తసుమ్ మెలె, దేముడు అమ్చి పెట్టి తత్తయ్, చి అమ్చితె జోచి ప్రేమ పూర్తి జా నెరవెర్పువ జతయ్, రుజ్జు జతయ్. జోచి ప్రేమక జయ్యి రుజ్జు మాన్సుల్ దెకుక జతయ్.

<sup>13</sup> \* ప్రబుచి తెడి తత్తసుమ్, జోచి జివ్క జితసుమ్, చి జో అమ్చి పెట్టి తత్తయ్ మెన కిసి జానుమ్ మెలె, జోచి సొంత ఆత్మ అమ్చి పెట్టి జో దిలిన్చి రిసా. <sup>14</sup> ఈంజ లోకుమ్చ మాన్సుల్క దొర్కు జలొ రచ్చించుప కెర్లొసా జో జంక మెన, జోచో పుత్తునక ఎత్తిక అబ్బొ జలొ దేముడు తెద్రవ అస్సె మెన అమ్ దెక కెర సాచి సంగితసుమ్. <sup>15</sup> యేసుక † దేముడుచొ పుత్తుసి మెన కో ‡ ఒప్పునుల గే, జోవయించి పెట్టి దేముడు తత్తయ్, చి జేవ్ దేముడుచి తెడి అస్తి, జోచి జివ్క జితతి. <sup>16</sup> దస్సి, దేముడు అమ్చి ఉప్పిరి ప్రేమ తిలిసి, అమ్చి ఉప్పిర్చి జోచి ప్రేమ, జానుమ్ నంపజా అస్సుమ్. దేముడు ప్రేమయి, చి కో ప్రేమయ్చి తెడి తత్తయ్ ప్రేమ ఇండితయ్ గే, దేముడుచి తెడి తత్తయ్, జోచి జివ్కయ్ జితయ్, చి దేముడు జో మాన్సుచి పెట్టి తత్తయ్.

<sup>17</sup> కిచ్చొక దేముడుచి ప్రేమ అమ్చి తెన్ కిపూర్తి జా నెరవెర్పువ

\* **4:13** 4:13 2:6, 24, 27, 28 చి 3:6, 24 చి 4:16 దెక, చి యోహాను 15:3-10 దెక.

† **4:15** 4:15 2:23, 3:23, 5:1, 5, 13 చి 5:20 దెక. ‡ **4:15** 4:15 మత్తయి

10:32-33 చి రోమియుల్ 10:9-10 దెక. § **4:17** 4:17 12 నంబర్ కోడు దెక.

జంక జోచి సెలవ్ మెలె, అమ్క ఎత్కిజిన్క పరిచ్చ కెర్తి వెల్లి దీసికయ్ 'సత్తిమ్ కెర్తమ్' మెన దయిరిమ్ తత్తు మెనయ్ జో జా సెలవ్ దెతయ్. జా దయిరిమ్ అమ్ కిచ్చొక జంక జయెదె మెలె, జో కీన్ జా అస్సె గే, అమ్ ఈంజయ్ లోకుమ్తె దనయ్ అసుమ్. జొయ్యి కీసి ప్రేమ అస్సె గే, అమ్ కి జోచి ప్రేమక మాన్సుల్క ప్రేమయ్ కెర్తసుమ్. <sup>18</sup> ప్రేమచి తెడి అమ్ తిలె, ప్రేమ అమ్ ఇండిలె, అమ్చి పెట్టి కిచ్చొ బయిమ్ తయె నాయ్. గని ప్రేమ పూర్తి తిలె, జా ప్రేమ బయిమ్ గెచ్చవ గెల్తయ్. బయిమ్ సిచ్చ జతిన్ తెన్ బెదితిసి, 'సిచ్చ జమ్దె' మెన అమ్ ఉచర్లె బిందె, చి కో బితయ్ గే, జోచి పెట్టి ప్రేమ పూర్తి జంక నెరవెర్పువ జంక నేతయ్ మెన రుజ్జు జతయ్. <sup>19</sup> దేముడు తొలితొ అమ్కయ్ ప్రేమ కెర్లొచి రిసాయి అమ్ జోక ప్రేమ కెర్తసుమ్.

<sup>20</sup> జలె, దేముడుక ఆవ్ ప్రేమ కెర్తస్ మెన కో సంగితయ్ గే, జో జోచి బావుడ్డిక ప్రేమ కెరె నాయ్ గే, జో అబద్దుమ్చొ. కిచ్చొక మెలె, కేన్ జవున్ దెకిలో బావొక కో ప్రేమ కెర్తయ్ నాయ్ గే, జో నే దెకిలో దేముడుక కీసి ప్రేమ కెరెదె! నెత్తె! <sup>21</sup> అన్నె, జో కిచ్చొ ఆగ్గు అమ్క దా అస్సె మెలె, కో దేముడుక ప్రేమ అస్తి గే, జోచ బావుడ్డివొక ప్రేమ కెరుకయ్.

## 5

### క్రీస్తుచి ఉప్పిర్చి నముకుమ్చి ప్రేమ

<sup>1</sup> యేసుక \* తెద్రయిందె మెన దేముడు పూర్ణయ్ సంగిలో దొర్కు జలో రచ్చించువ కెర్లొసా జలో క్రీస్తు జొయ్యి మెన నంప కెర్లొ ఎత్కి మాన్సు దేముడుచొ బోద జయెదె, అన్నె, కో అబ్బొస్క ప్రేమ కెర్తయ్ గే, జో అబ్బొస్చ అన్నె బోదల్క కి ప్రేమయ్ కెర్తయ్. <sup>2</sup> దేముడుచ బోదల్క అమ్ ప్రేమ కెర్తిసి కిచ్చొ రుజ్జుతె డీస్తయ్ మెలె, దేముడుకయ్ అమ్ ప్రేమ తా, అమ్ జోచి ఆగ్గుల్ రితి †ఇండితిన్తె, <sup>3</sup> దేముడుచి ప్రేమ

\* **5:1** 5:1 2:23, 3:23, 4:15, 5:5, 13, 20 దెక. † **5:2** 5:2 మెలె, అమ్ కీస కీస మాన్సుల్క ప్రేమ దెకవుక గే జోవయింప ఆగ్గుల్తె, యేసుక్రీస్తుచ కొడతె, మోసే తెన్ దేముడు దిలి ఆగ్గుల్ ఎత్కితె జో దెకవ అస్సె.

అమచి పెట్టి తిలె, జోచ ఆగ్నల్ రితి ఇండుమదె. అన్నె, జోచ ఆగ్నల్ జాడు వయడ్డన నెంజితి. <sup>4</sup> కిచ్చొక మెలె, దేముడుచి సుద్ది తిలి ఆత్మతె జెర్మున్ కో జా తవుల గే, ఈంజ లోకుమ్చ †బుద్దివొచి ఉప్పిరి జీన్తతి. ఈంజయ్ లోకుమ్చ బుద్దివొచి ఉప్పిరి జీన్తిసి కిచ్చొ మెలె, యేసుచి ఉప్పిరిచి అమచి నముకుమ్. <sup>5</sup> మెలె, కో ఈంజ లోకుమ్చ బుద్దివొచి ఉప్పిరి జీన్తతి మెలె, యేసుకయ్ 'జొయ్యి దేముడుచొ పుత్తుసి' మెన కో నంపజా అస్తి గే, జెవ్వి.

<sup>6</sup> పాని వాట్ లోయి వాట్ గెచ్చు అన్నె బార్ జా జో దేముడుచొ పుత్తున్ జలిన్ రుజ్జు జలోసా, జో రచ్చించుప కెర్తొసా జలో, యేసుక్రీస్తు. జో ఎక్కి పాని వాట్ గెచ్చు బార్ జయె నాయ్ గని పాని తెన్ లోయి తెన్ బార్ జా అస్సి. అన్నె ఈంజ చి రిసా దేముడుచి సుద్ది తిలి ఆత్మ సాచి సంగితయ్, కిచ్చొక మెలె దేముడుచి సుద్ది తిలి ఆత్మ సత్తిమ్ జా అస్సి. <sup>7</sup> అన్నె, యేసుక 'దేముడుచొ పుత్తుసి జొయ్యి', 'దేముడు తెద్రయ్లో రచ్చించుప కెర్తొసా జలో క్రీస్తు జొయ్యి' మెన పానితెచి సాచిచి జోవయించి సూయి జలి లోయిచి సాచి తెన్ బెదితి సాచి సంగితొసా కొన్సొ మెలె, దేముడుచి సుద్ది తిలి ఆత్మయి. జోవయించి ఆత్మచి సాచి ముక్కిమ్. కిచ్చొక మెలె, జోవయించి ఆత్మ సత్తిమ్చి. <sup>8</sup> జోక, కీదొర్కు జల తిన్ని సాచుల్ అస్తి, చి జోవయించి సాచి బెదితయ్, కిచ్చొ కిచ్చొ సాచుల్ మెలె, జా పాని, జా లోయి, చి దేముడుచి సుద్ది తిలి ఆత్మ. <sup>9</sup> ఆమ్ మాన్సుల్చి సాచి నంప కెర్తసుమ్ జలె, దేముడుచి సాచి అన్నెయ్ నంపజతిసి. అన్నె, దేముడుచి సాచి కిచ్చొ మెలె, యేసుక 'ఈంజొయి అంచొ పుత్తు' మెన జొయ్యి సాచి సంగ అస్సి. <sup>10</sup> పడ్డె, దేముడుచొ పుత్తున్కయ్ 'నిజుమి జోచొ పుత్తుసి' మెన కో నంపజవుల గే, జోవయించి పెట్టి దేముడుచి సాచి అస్సి. 'ఈంజొ అంచొ పుత్తు' మెన దేముడు సాచి సంగిలిన్చ ఉప్పిరి కో నముకుమ్ తితి నాయ్ గే, జోచి కోడు నంపజతి నాయ్ చి రిసా,

† 5:4 5:4 కీస బుద్దివొ మెలె, గోసల్, ఆసల్, చోర్బుద్ది, కోపుమ్బుద్ది, దసచ ఎత్తి.

§ 5:8 5:8 యూదుల్చ ఆగ్నల్ తెన్ 'దొగుల తీగ్ల సాచుల్ సంగిలిన్ బెదిత సత్తిమ్' మెంతతి.

జోక 'అబద్ధుమచో' మెన సంగిల్ రితి జతయ్.

11 జలె, నత్తిమచి సాచి కిచ్చొ మెలె, పరలోకుమచి రాజిమతె జితి వాట, జాక దొర్కు జలి జీవు, దేముడు అమ్క దా అస్సె, చి ఈంజ జీవ్ కచి తెడి అస్సె. కత్తెయ్ దొర్కు జతయ్ మెలె, జోచొ పుత్తున్చి తెడి అస్సె, జో తెయి దొర్కు జతయ్. 12 కచి పెట్టి దేముడుచొ పుత్తున్ అస్సె గే, జోకయ్ జా జీవు. దేముడుచొ పుత్తుసి కచి పెట్టి తయె నాయ్ గే, పరలోకుమతె గెతి వాట, జాక దొర్కు జలి జీవు, జోకయ్ దొర్కు జయె నాయ్. 13 దేముడుచొ పుత్తున్చి నావ్క 'జయ్యి. జొయ్యి క్రిస్తు రచ్చించుప కెర్తొసా' మెన తుమ్ జోక నంపజలనక 'పరలోకుమతె గెతి కెయక తెయక తా గెతి వాటచి జాక దొర్కు జలి జీవు దొర్కు జలిన్చి రిసా తుమ్క దయిరిమ్ తవున్' మెనయ్ ఈంజ ఆవ్ రెగిడ్తసి.

14 అన్సె, జోచి తెడి అమ్క అన్నెయ్ కిచ్చొ దయిరిమ్ మెలె, జోచి ఇస్టుమ్ తెన్ బెదితిసి కిచ్చొ జవున్ జోతె అమ్ నజీలె, జో సూన్తయ్.

15 అన్సె, 'అమ్ కిచ్చొ నజీలె జో సూన్తయ్' మెన జానుమ్ జలె, జోతె అమ్ సంగిలిన్క 'దొర్కు జలి' మెన ఒప్పన్ల రితి, 'కచితుమ్ దొర్కు జయెదె' మెన జానుమ్.

16 నంపజలో కేన్ జవున్ బావొ మొర్నొ ఆన్తి పాపుమ్ కెర్లెగిన, అన్నెక్లో బావొన్ దెకిలె, జా పాపుమ్ జోక మొర్తి సిచ్చ నే ఆన్తి రిత, "జోక చెమించుప కెరు మెన" జో అన్నెక్లో దేముడుక ప్రార్దన కెర్లె, చి కచి పాపుమ్ మొర్తి సిచ్చ ఆన్తిన్ నెంజె జలె, జో అన్నెక్లో ప్రార్దన కెర్లి రిసా, జో పాపుమ్ కెర్లొసాక దేముడు జీవ్ దెయెదె. గని మొర్తి సిచ్చ ఆన్తి పాపుమ్ కి తయెదె. కో దస్సి పాపుమ్ కెర్లె, జోచి రిసా ప్రార్దన కెర మెని నాయ్. 17 గార్చి కిచ్చొ జలెకి పాపుమీ, గని సగుమ్ రగల్ పాపుమ్ మొర్తి సిచ్చ ఆన్తన నెంజితి.

18 'కో దేముడుచి తెన్ జెర్మున్ జా అస్తి గే, పాపుమతె ఇండితి నాయ్' మెన జానుమ్. దేముడుచి పెట్టిచొ క్రిస్తు దన మాన్సుల్క రకితయ్చి రిసా, పాపుమ్ సికడ్తొ సయ్తాన్ జెవ్వి మాన్సుల్క చడె

నాయ్. 19 అమ్మి జలె, 'దేముడుచ బోదల్ జా అస్సుమ్' మెన జానుమ్, అన్నె, అప్పెక ఒండి లోకుమ్ జో పాపుమ్ కెరయ్తో సయ్తాన్చి అత్తి అస్సె మెన కి జానుమ్. 20 అన్నెయ్ కిచ్చొ జానుమ్ మెలె, నిజుమ్చొ దేముడుక అమ్ జాన్తి రితి జో దేముడుచొ సొంత పుత్తుసి బార్ జా కెర, జోక చినితి జోక జాన్తి సెక్తి అమ్క దా అస్సె మెన జానుమ్. అన్నె, సత్తిమ్ తిలో దేముడుచి తెడి, జోచొ పుత్తున్ యేసుక్రీస్తుచి తెడి అస్సుమ్. ఈంజొయి నిజుమ్ తిలో ఎక్కిలో దేముడు. పరలోకుమ్తె బెదితి కెయ్క తెయ్క చెంగిల్ తతి వాట యేసుక్రీస్తుతెయ్ దొర్కు జతయ్, జోక దొర్కు జలి జీవ్ జొయ్యి.

21 ప్రేమ తిల పుత్తర్లు, బొమ్మల్క జొకర్తినక తుమ్ దూరి తా.

**Kupia New Testament**  
**Kupia: Kupia New Testament (New Testament)**

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files  
dated 29 Jan 2022

7ccb2690-4432-5e86-88c1-f8ee976f30f4